

Inatsisisatut siunnersuummut oqaaseqaatit**Oqaaseqaatit nalinginnaasut****1. Aallaqqasiut**

Namminersornerullutik Oqartussat missingersuutaat pillugit Inatsisartut inatsisaanni (Missingersuutinut inatsimmi) nr. 8, 29. oktober 1999-imeersumi, Inatsisartut inatsisaatigut nr. 1, 23. maj 2000-imeersukkut allanngortinneqartumi § 10-mi aalajangersakkami allassimavoq aningaasanut inatsit ukioq aningaasanut inatsiseqarfiusoq sioqquallugu 15. november nallertinnagu akuersissutigineqartassasoq. Aalajangersagaq taamaaqataa Inatsisartut Naalakkersuisullu pillugit Inatsisartut inatsisaanni § 15, imm. 1-imi allassimavoq.

2016-imut aningaasanut inatsisisap aappassaaneerneqarnissaata pingajussaaneerneqarnissaatalu kinguartinneqarnissaasa Inatsisartut Siulittaasoqarfiannit aalajangiunneqarnerat tunngavigalugu matumuuna siunnersuutigineqarpoq, 2016-imut aningaasanut inatsisisap akuersissutigineqarnissaanut piffissaliussaq sivitsorneqassasoq, Inatsisartut aningaasanut inatsisisatut siunnersuutip suliarinissaanut piffissaqarnissaat qulakkeerumallugu.

Tamannali aamma piffissaliussat allat sivitsorneqartariaqarnerannik kinguneqassaaq:

Aningaasarianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi aalajangersarneqarpoq, nunamut tamarmut akileraarutissap aamma nunamut tamarmut immikkut akileraarutissap procentii qaammatisiutit malillugit ukioq pineqartoq sioqquallugu 15. november nallertinnagu Inatsisartunit aalajangerneqartassasut. Procentit akileraarusiissutit aningaasanut inatsisip ilaatut angissusilerneqartarput. Taamaammat siunnersuutavoq ukioq manna piffissaliussaq, aningaasanut inatsisisap akuersissutigineqarnissaanut piffissaliussaq assigalugu 22. novemberimut sivitsorneqassasoq.

Aningaasarianit akileraarutit pillugit Inatsisartut inatsisaanni (§ 62, imm. 2-mi) aalajangersarneqarpoq kommunimut akileraarutissap procentia qaammatisiutit malillugit ukioq pineqartoq sioqquallugu 1. december nallertinnagu communalbestyrelsimit aalajangerneqartassasoq. Kommunit missingersuusiortarnerat, aningaasanik tigoriaannaateqarnerat, naatsorsuutaat, kukkunersiuisoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaanni nr. 3, 3. februar 2012-imeersumi aalajangersarneqarpoq, kommunit ukiumut aningaasanut inatsiseqarfiusumut tullermut missingersuutaat kingusinnerpaamik kommunimut akileraarutip procentiata, Aningaasarianit akileraarutit pillugit Inatsisartut inatsisaat malillugu angissusilerneqarnissaanut piffissaliussaq nallertinnagu akuersissutigineqarsimassasut.

Aningaasanut inatsisissap suliarineqarnissaanik kinguartitsinerup aammattaaq kingunerissaavaa kommunit kommunalbestyrelsillu 2016-imut missingersuutinik kommunimullu akileraarummik akuersissuteqarnissaminnut piffissakinnerunissaat, tamannalu kommunit aalajangersakkanik taakkuningga malinninniarnissaannut ajornakusoortitsisinnaavoq. Taamaammat siunnersuutaavoq 2016-imut kommunimut akileraarummik angissusiliinissamut piffissaliussaq 7. decemberimut sivitsorneqassasoq.

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutinut akiliuteqartarneq pillugu Namminersorlutik Oqartussat nalunaarutaanni nr. 3, 4. februar 2011-meersumi (§ 1, imm. 1-imi) aalajangersarneqarpoq, kommunalbestyrelsi meeqqanut suli atualinngitsunut ulluunerani neqeroorutinut ukiumi tullermi akigitassanik kingusinnerpaa-mik novemberimi aalajangersaasassasoq. Aningaasanut inatsisip akuersissutigineqarnissaanut piffissaliussamik kinguartitsineq kommunit aalajangersakkanik taakkuningga malinninniar-nissaannut ajornakusoortitsisinnaavoq. Taamaammat siunnersuutaavoq 2016-imi akigitassanik angissusiliinissamut piffissaliussaq 7. decemberimut sivitsorneqassasoq.

2. Siunnersuutip imarisai pingarnerit

2016-imut aningaasanut inatsisip akuersissutigineqarnissaanut piffissaliussaq siunnersuutip kingunerisaanik 22. november 2015-imut sivitsorneqassaaq. Piffissaliussat allat, Inatsisartunut kommunalbestyrelsinullu atuuttut taassuma kingunerisaanik aamma sivitsorneqassapput, tak. aallaqqaasiineq aalajangersakkanullu ataasiakkaanut oqaaseqaatit.

3. Pisortanut aningaasatigut allaffissornikkullu sunniutissai

Siunnersuut pisortanut sunniuteqangaarnissaa naatsorsuutigineqanngilaq. Kisianni missingersuutinik, akileraarusiissutissat angissusiinik aammalu meeqqanik paaqqinninnermut aki-gitassanik nutaanik akuersissuteqarnissat pisarnermit kingusinnerusukkut pissapput.

4. Inuussutissarsiutinik ingerlataqartunut il.il. aningaasatigut allaffissornikkullu sunniutissai

Siunnersuut inuussutissarsiutinik ingerlataqartunut aningaasatigut sunniuteqassanngilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu sunniuteqassanngilaq.

6. Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqassanngilaq.

7. Naalagaaffeqatigiinnermut Namminersorlutilu Oqartussanut tunngasut

Siunnersuut Naalagaaffeqatigiinnermut Kalaallilluunniit Nunaata tunngaviusumik inatsisitigut inissisimaneranut sunniuteqassanngilaq.

8. Oqartussaasunik kattuffinnillu tusarniaaneq

Siunnersuut piffissakilliorneq pissutigalugu tusarniaassutigineqanngilaq. Inatsisissatut siunnersuut Namminersorlutik Oqartussani naalakkersuisoqarfait attuumassuteqartut isumasiorluit suliarineqarpoq, soorluttaaq kommunit tamatuminnga ilisimatinneqareersut.

Inatsisissatut siunnersummi aalajangersakkanut ataasiakkaanut oqaaseqaatit

§ 1-imut

1. Inatsisartut 2016-imut aningaasanut inatsisaata kingusinnerpaamik 22. november 2015-imi akuersissutigineqarnissaa siunnersuutigineqarpoq. Taamaaliornikkut Missingersuutinut inatsimmi § 10 aamma Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussat atuuttut (15. november) avaqqunneqassapput.

Nunamut tamarmut akileraarutip aamma nunamut tamarmut immikkut akileraarutip 2016-imut procentissaasa kingusinnerpaamik 22. november 2015-imi angissusilerneqarnissaat siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi piffissaliussat atuuttut (15. november) avaqqunneqassapput.

Kommunimut akileraarutip 2016-imi procentiata kingusinnerpaamik 7. december 2015-imi angissusilerneqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 62, imm. 2-mi piffissaliussat atuuttoq (1. december) avaqqunneqassaaq. Kommunimut akileraarummik akuersissuteqarnissamut piffissaliussamik allannguinerup aammattaaq kingunerissavaa kommunit 2016-imut missingersuutaasa, Kommunit missingersuusortarnerat, aningaasanik tigoriaannaateqarnerat, naatsorsuutaat, kukkunersiuisoqarnerat kiisalu karseqarnerat naatsorsuuseriveqarnerallu pillugit Namminersorlutik Oqartussat nalunaarutaat nr. 3, 3. februar 2012-imeersoq naapertorlugu akuersissutigineqarnissaannut piffissaliussap taamatulli tassaalernissaa 7. december.

Kiisalu siunnersuutaavoq, meeqqat suli atualinngitsut kommunit ulluunerani neqeroorutaanniinnerinut 2016-imi akiliutissat kingusinnerpaamik 7. december 2015-imi angissusilerneqassasut. Taamaaliornikkut Meeqqanut suli atualinngitsunut perorsaanikkut inerikkiartuaasumik ulluunerani neqeroorutinut akiliuteqartarneq pillugu Namminersorlutik Oqartussat nalu-

naarutaanni nr. 3, 4. februar 2011-imeersumi § 1, imm. 1-imi piffissaliussaq atuuttoq (kingusinnerpaamik novemberimi) avaqqunneqassaaq.

§ 2-mut

Inatsisip akuersissutigineqarnermini erngerluni atortuulernissaa, ullorlu 1. januar 2016-imi ingerlaannaq atorunnaarnissaa siunnersuutigineqarput.